

# Akta Kawalan Kasino bakal diperketat

*Langkah melindungi golongan berisiko dari kesan negatif judi*

Oleh **ADLI YASHIR KUCHIT**  
*adli@sph.com.sg*

PEMERINTAH ingin memperketatkan lagi kawalan dengan meminda Akta Kawalan Kasino (CCA) bagi melindungi golongan berisiko tinggi daripada kesan negatif perjudian di kasino dan akan mendapatkan maklum balas orang ramai dan industri sebelum membentangkan pindaan di Parlimen pada lewat tahun ini.

Antara pindaan yang dirancang melibatkan aspek sosial, usaha menangani jenayah serta aspek ekonomi dan pentadbiran cukai.

Sebagai contoh, pemerintah bercadang menghadkan jumlah kunjungan ke kasino bagi penduduk setempat yang mempunyai masalah kewangan atau berisiko tinggi.

Menteri di Pejabat Perdana Menteri merangkap Menteri Kedua Ehwah Dalam Negeri, Encik S. Iswaran, berkata pindaan ke atas CCA yang dirancang selaras dengan dasar memandang ke depan pemerintah.

“Resort bersepadu (IR) telah beroperasi selama lebih dua tahun dan kita kini mempunyai lebih banyak pengalaman dan memahami sekitaran operasi IR. Kami juga ingin meletakkan lebih banyak kawalan bagi memastikan IR mencapai matlamat menyumbang kepada ekonomi negara.

“Kami juga inginkan peraturan lebih ketat demi mengekang jenayah dan melindungi penduduk daripada kesan negatif kasino,” kata Encik Iswaran.

Beliau berkata demikian ketika ditemui wartawan di bangunan The Treasury, High Street.

Menyentuh mengenai aspek sosial, Encik Iswaran berkata pindaan pada CCA akan memperketatkan lagi kawalan khususnya bagi melindungi penduduk setempat daripada kesan buruk kasino.

“Dalam hal ini kita memberi tumpuan kepada golongan yang menghadapi masalah kewangan tetapi kerap mengunjungi kasino,” ujar Encik Iswaran.

Selain saranan menghadkan kunjungan ke kasino bagi golongan bermasalah, pemerintah juga mempunyai rancangan meluaskan kuasa Majlis Kebangsaan Terhadap Masalah Perjudian (NCPG) mengeluarkan perintah larangan mengunjungi kasino.

Seterusnya, Encik Iswaran menerangkan IR diperkenalkan bagi meningkatkan peluang pekerjaan bagi penduduk serta menyumbang kepada ekonomi negara.

Selaras dengan usaha tersebut, sebuah panel akan ditubuhkan bagi menilai kelakonan IR dalam bidang ekonomi.

“Kasino merangkumi peratusan kecil IR, terdapat banyak lagi tarikan di IR dan kita mahukan para pengendali memastikan tarikan-tarikan bukan kasino di IR terus berada di tahap dunia,” jelas Encik Iswaran.

Mengenai usaha mengekang jenayah pula, Encik Iswaran berkata: “Kasino tidak mempunyai kesan serius terhadap ketenteraman awam malah bilangan kes-kes jenayah di kasino merangkumi peratusan kecil jenayah yang berlaku di sini dan kes-kes yang berlaku juga tidak begitu serius.”

“Kami ingin memperkenalkan undang-undang baru sebagai langkah memandang ke depan bagi memastikan jenayah tidak bertapak di kasino.”

Sehubung itu, pemerintah mengalu-alukan maklum balas orang ramai mengenai pindaan pada CCA.

Orang ramai boleh mengirim pandangan mulai lusa hingga 6 Ogos menerusi e-mel ke [mha\\_cca\\_consultation@mha.gov.sg](mailto:mha_cca_consultation@mha.gov.sg)